

"Et muss ee kënnen zouginn, datt ee sech geiert huet"

04. Jun 2019 - 12:00

De Bob Reuter ass zanter engem knappe Mount den neie President vun AHA, der Allianz vun Humanisten, Atheisten an Agnostiker. De Wiessel hätt awer näischt mat deem ëmstriddene Communiqué ufanks Mäerz ze dinn, seet hien.

Maurice Molitor / cbi



De Bob Reuter ass den neie President vun AHA

An dësem Communiqué hat AHA zéng Recommendatioune gemaach, wéi d'Leit hir Kanner sech viru pedophillen Tendenzen an der Kierch kënnen schützen. Domat géif déi ganz Kierch ënner Generalverdacht gestallt ginn, hate Kritiker deemools gemengt.

Dat wier awer net d'Zil vun deem Communiqué gewiescht an no internen Diskussiounen hat AHA dës Recommendatiounen no 14 Deeg zeréckgezunn. "Dat gehéiert dann och zum Humanismus: et muss ee kënnen zouginn, datt ee sech geiert huet a sech eben och entschëllegen oder ëm Entschëllegung bieden", seet de Bob Reuter.

D'Privileegie reduzéieren

Eent vun den Ziler vun AHA wier et, déi finanziell a kulturell Privileegien, déi d'kathoulesch Kierch zu Lëtzebuerg iwwer Joerzénngten a Joerhonnerte genoss hätt, ze reduzéieren "an op e gerechten Niveau ze bréngen", seet de Bob Reuter. D'AHA begréisst deen éischte Schrëtt, deen am Laf vun der leschter Legislaturperiod an déi Richtung gemaach ginn ass, hofft awer, datt et domat net gedoen ass.

Déi Kierchen, déi weder vum Kierchefong nach vun de Gemengen iwweholl goufen a fir de Culte reservéiert bleiwen, sollten als architektonesch Kulturgidder erhale ginn a reafektéiert gi fir aner Zwecker, déi der Allgemengheet zegutt kommen, fënnt de Bob Reuter. Si géifen zum Patrimoine gehéieren. Fir d'AHA wier et kee Problem, wann déi Gebaier mat öffentleche Suen géifen ënnerhale ginn, "esou laang wéi dann och de Staat oder d'Gemengen d'Méiglechkeet hunn, déi Gebailechkeeten am Sënn vun alle Bierger ze notzen".

"Sech vun där Iddi léisen"

De Bob Reuter huet de viregte President Laurent Schley op der leschter Generalversammlung un der Spëtz vum der ronn 800-Member-staarker Associatioun ofgeléist. Hie selwer gouf kathoulesch erzunn, "esou wéi wahrscheinlech vill Leit hei zu Lëtzebuerg", seet hien. Doduerch hätt hie sech fir d'Fro vu Gott an der Welt interesséiert.

"Irgendwann eng Kéier hunn ech fir mech entdeckt, datt ech mech befreie kéint vun där Iddi, datt et e Gott gëtt an datt Relioun eng wichteg Komponent a mengem Liewen ass. [...] Am Nachhinein géif ech scho soen, datt och eng gewëss Moral vun der kathoulescher Kierch, an där ech och als Kand an der Grondschool opgewuess sinn, mech belaascht huet a mech onfräi gemaach huet."

An der Mediathéik:

[Invité vum Dag](#) / 04. Jun 2019 - 07:32 / [Maurice Molitor](#)

Lauschteren 